

La Posta duai resguardar meglier las muntognas

Il cussegl naziunal pretenda midadas

DA LUCAS DEPLAZES / ANR

■ **La reduziun massiva dal dumber dals uffizis da posta ha provocà dira critica. Diversas intervenziuns politicas han procurà ier per ina viva debatta en il cussegl naziunal. Per la distribuziun en las regiuns da muntogna duain vegnir formulads criteris regiunals.**

En pliras moziuns pretenda la cummissiun per traffic e telecomunicaziun diversas midadas da la lescha davart La Posta. La directiva dal cussegl federal a La Posta da procurar per in provediment da basa regular per 90% da la populaziun na tegnia betg quint da las relaziuns en ils territoris da muntogna. Var 800 000 persunas – principalmain en territoris periferers – pon vegnir excludas. Per la gronda part sa tracti da vitgs ed uclaus en las muntognas. *Martin Candinas* (pcd/GR), il pledader da la cummissiun, ha punctuà che ils criteris naziunals per La Posta na tegnian betg sufficientmain quint da la situaziun en las regiuns periferas. Per garantir a l'entira populaziun in servetsch da basa egual ston vegnir formulads er criteris per las regiuns. Per ils servetschs da pajaments duain questas regiuns avair ils medems dretgs d'access, quai vul dir che la distanza fin il proxim uffizi postal duai esser generalmain pussaivla en 20 minutas. Plinavant duain las agenturas postales porscher las medemas prestaziuns sco ils uffizis postals existents. Ils servetschs postals da las agenturas duain vegnir indemnissads commensuradamain, quai vul dir ch'ils custs ston esser curclads. Davart las relaziuns da servetsch duain er valair

ils contracs collectivs da lavur, han exponents dal persunal pretendi.

La Posta duai restar en maun public

Divers votants vulan ina liberalisaziun pli ferma e pretendan ina concorrenza eguala er per instituziuns privatas. *Viola Amherd* (pcd/VS) fa attent che la pcd refusia la moziun che pretendla ils medems dretgs per la concorrenza privata sin il martgà liberalisà. Ils servetschs postals da basa duain restar en maun public. *Natalie Rickli* (pps/ZH) accentuescha che La Posta sa drizzia suenter ils basegns da la clientella. Serra ella in uffizi postal, indirizza ella persuenter puncts d'access. La Posta haja gia reagì sin la critica da la populaziun e procurà per midadas. En l'avegnir pon ins er fa pajaments a chasa

tar il postin. Las agenturas acceptan era spediziuns en massa.

Cura essas vus stads sin Posta?

Doris Leuthard, la presidenta da la confederaziun, tschenta la dumonda cardinala: «Cura essas vus stads l'ultima giada sin posta?» La Posta stoppia s'adattar als novs basegns da la clientella ed a las pussaivladads da la digitalisaziun. Ils uffizis da posta na vegnan betg simplamain serrads, els vegnan remplazzads cun agenturas da posta che porschan uras d'avertura pli lungas. Finamira da La Posta saja schizunt d'augmentar il dumber dals puncts d'access. Actualmain fan ils uffizis da posta in deficit da var 200 milliuns francs. Ils pajaments ed il dumber da las brevs èn sa reducids massivamain. La lescha pretenda er

da La Posta in manaschi che respecta criteris economics. Era las bancas reducechan lur filialas. Sun fundament d'in recent rapport e las reacziuns da la populaziun en connex cun la restructuraziun dal uffizis da posta prevesa il cussegl federal diversas adattaziuns da la lescha davart La Posta. En l'avegnir duain privats er avair access als caums postals ed a las chaschas da brevs privatas. En tals cas ston convenas cun ils interessents vegnir elavuradas che garanteschin ina indemnissaziun commensurada. La ministra da traffic fa attent che La Posta porschia in servetsch public excellent. En cumparegliaziun cun l'Europa è La Posta sin l'emprima posiziun. Cun clerias maioritads ha il cussegl naziunal acceptà las trais moziuns che pretendan diversas midadas da la lescha da Posta.



La decisiun da La Posta da serrar diversas postas ha chaschunà blera irritaziun.